

Date – 23/01/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. PHE Minister Prof. Lalnilawman mahni in leh kawtkaia kartluana chatlak lova tui herhhaw theihna tur '24X7 Pilot Project', Aizawl Vaivakawn leh Chawnpui veng hmun thenkhata kalpui tur chu a hawng.
2. Mizoram sawrkarin thla thar February ni 2 atangin kuthnathawktute tan a thlai thar lei leh hralh a kalpui tan dawn.
3. Union Rural Development Minister Shivraj Singh Chouhan chuan VB G RAM G chu scheme hmasa MGNREGA scheme-a awng awm laite hnawh phui tura siam a nih thu a sawi
4. Jharkhand-a West Singbhum district ah Maoist hel mi 15 sipaiten an kaphlum..

<><><>

PHE

PHE Minister Prof. Lalnilawma chuan, AMRUT 2.0 hnuaia thawh tur, mahni in leh kawtkaia kartluana chatlak lova tui herhhaw theihna tur '24X7 Pilot Project', Aizawl Vaivakawn leh Chawnpui veng hmun thenkhata kalpui tur chu a hawng.

Hawna inkhawm hi nizan khan Helen Lowry Auditorium, 7th Day Tlangah buatsaih niin PHE Minister chuan 24X7 tui herhhaw theihna tur project chu Mizoram tan mellung pawimawh tak a nih thu a sawi a, UD&PA kaltlanga MoHUA atanga hmuh a nih thu sawiin Cheng Vbc 5.24 seng a thawh tur niin, pilot project a nih angin chhungkua/In 300 a huam dawn a, smart meter vuah vek tur a ni a, project atan hian pipeline network thar hman a nih tur thu a sawi.

Hmasawna hna thawh kawngah department ten harsatna hrang hrang an tawh thin thu sawiin, hna thawh nan in hmun leh ramte khawih chet a ngaih chang a awm fo thin avangin veng thenkhatah chuan veng neitute'n an rem tih loh thin thu te, forest leh environmental clearance kawnga harsatna awm thinte avangin hna thawh a harsat chang a tam thute a sawi a, chutiang a nih laia 24x7 Pilot Project kalpuina tura veng mipuite inpeknaah lawmthu sawiin theihtawp chhuahpui turin a sawm nghal bawk a, Aizawl mai ni lo khawpui dangte pawhin tui hnianghnar an neih theih nan Central Ministry lamah pawh khawpui dangte tan pawh project lian tham tak tak theh luh a nih thu a sawi bawk.

24x7 water supply hna hi thla 4 atanga thla 6 chhunga zawh fel tum a ni.

<><><>

MAMB

Mizoram sawrkarin thla thar February ni 2 atangin kuthnathawktute tan a thlai thar lei leh hralh a kalpui tan dawn.

He thu hi nimina Mizoram Agricultural Marketing Board (MAMB) in Aizawl Press Club a thuthar thehdarhtute an kawmnaah an sawi a, MAMB co-chairman, adviser to CM (Handholding) ni bawk Dr KC Lalmalsawmzauva chuan sorkarin kuthnathawktute thar chhuah thlai thar chi 5 - Sawhthing, Aieng hring, Hmarchate ro, Hmunphiah ro leh Mizo buh hum te a lei sak dawn a ti a, Sawhthing ah minimum rate chu kg 1 cheng 50 zel a ni a, support price chu kumin February ni 2 atanga May

ni 30 thleng an pe dawn a ni. Aieng hring minimum rate chu kg 1 ah cheng 20 a ni a, hmarchate ro minimum rate chu kg 1 ah cheng 350 a ni a, Aieng hring leh hmarchate ro support price chu February ni 2 atanga April thla thleng pek a ni dawn a, Hmunphiah ro minimum rate chu kg 1 ah cheng 80 niin support price chu February ni 2 atanga March thla thleng a pe dawn a, Mizo buh hum minimum rate chu kg ah cheng 30 niin, nikum November thla atanga kumin January thla kal mek thleng an lei sak bawk tih a sawi a ni.

MAMB hotute chuan Hmunphiah chu ZOHANCO-in an buaipui dawn a, a ro tha grade thliar loin cheng 80-in sawrkarin collection centre a siam:- Sakawrdai, Saitual, Marpara South, Marpara North, West Phaileng, Bilkhawthlir, Saipum, Mamit, Tlabung/Tiperagath, Lungsan, Thenzawl, Vairengte leh Lungleiah te a lei khawm ang.

Kuminah chuan Aieng chu a hring chauh lei a ni tawh dawn a, MAMB hotute chuan Aieng chu a hmel mawihnai leh tha te thlang chhuak turin a thar chhuaktute an ngen a, sorkar chuan a lei turin firm/society pasarih a ruat a, Rozik Herbal chuan Aieng hnah ro quintal 1 chu cheng 100 in a lei dawn bawk a ni.

Mizo buh hum chu nikum November thla atanga tun thla kal mekah hian lei a ni a, kg nuai 1, sing 6, sang 8, 839 lei tawh niin lei mek zel a ni a, nikuma an kalpui dan aia a danglamna chu Mamit leh Kolasib district-ah te chauh ni tawh lovin, Mizoram pum atangin a duh chuan Kolasib Pangbal kawnah an hralh thei a ni.

Hetihlai hian Mizo hmarchate ro chu hralh chhuah a nuam hle tih an sawi a, nikumah pawh sorkar puihna tel lovin an lo hralh tawh a, kuminah pawh sorkar inrawlh ngai lo, Support price pek ngai lo tura beisei a nih thu an sawi a, Mizoram hmarchate (bird eye chilli) chu Mizoramin a neitu nihna GI tag a nei tawh avangin chin uar deuh deuh tha an tih thu an sawi bawk a ni.

<><><>

CM

Chief Minister Pu Lalduhoma chuan a office-ah Mizo Language Development Board hnuaia din Eight Schedule Study Group te a kawm a, an hmalaknate a thlirpui. Study Group hian an report an la thehlut chiah lova, thehluh theihin an peih thawkhat tawh a ni.

Hun reilote chhunga hmalakna tha tak an lo kalpui avangin Chief Minister hian MLDB te chungah lawmthu a lo hrihl a. A umzui zel dan tur an rawtnate pawh tha a tih thu hrihlh bawhzui a nih tur thu a lo hrihlh.

Eight Schedule Study Group te hian Mizorama pawl leh hnam pual hrang hrangte kawm kualin Eight Schedule-a Mizo tawng thun chungchanga an ngaihdante a zawt kual a. An kawm tawh zawng zawngten Mizo tawng eight schedules-a dah hi tha an ti tlang hle a ni, an ti.

Mizoram hian tunhmain dilna a lo thehlut tawh tih an tarlang a, umzuina engmah a awm lo thung a. Study Group te hian Task Group dina, dilna hi a thara thehluh a, chak taka bawhzui thaa an ngaihthu an thlen a ni.

Mizo tawng hi kum 1974 kha state official language a puan a ni tawh a, khawvel ram hrang hranga awm Zo hnahthlak zawng zawngte inbiakpawhna a ni a, Sahitya Academy chuan regional language-ah a pawm a, zirna lamah PhD thlenga zir theih a ni.

Peoples Linguistic Survey of India chuan Mizo tawng chu tawng thang chho mek a nih thu a sawi a, UNESCO chuan khawvela tawng him a thliar hran zingah a him ber dawttu 'Vulnerable' huangah a dah a, census hnuhnung ber 2011 data-in a tarlan danin India ram state 26 ah leh UT 7 ah Mizo tawng hmang an cheng a, chhiarpui tharah chuan state zawng zawng a huam tawh ngei rin a ni. Mizorama Mizo tawng hmangtu zat hi 2011 chhiarpui mi 8,30,846 an ni a, chhiarpui tharah nasa taka a pun rin a ni. Zirtu thenkhat chuan tunah hian khawvel pumah Mizo tawng hmangtu hi nuai sawmhnih pahnih chuang an awm tawh niin an ngai.

Google translate chuan kum 2022 May ni 11 atang khan Mizo tawng chu tawng danga lehlin theihin a dah tan a. Hemi tum hian Google hian khawvela tawng chi hrang 1745 an zirchian zingah tawng 24 chu google translate-a dah turin an thlang a. Mizo tawng hi a tel pha a ni. Mizo Language Development Board atang hian Chairman Pu R. Lallianzuala leh Pu Lalsangpuia, Secretary bakah Dr. Zoramdinthara leh Dr. H. Laldinmawia, Member, 8th Schedules Study Group te an tel a ni.

<><><>

VAIRENGTE

Kawngpui thlur 4-a kal tura ruahmanna Fourlane Package 2 chu Vairengte ah thawh tan a ni.

Vairengte khuaa kawngpui thlur 4-a kal tura hmalakna kal zelah Fourlane Package 2 kawng laih chu thawh tan leh niin he kawng hi Vairengte hmar lam kawngthar veng atanga Lailapur inkar siam tura ruahman a ni a, Package 2 hi Vairengte Auto stand (kawngthar Veng) chhak tlang atanga laih tan niin Package 2 hi Lailapur(Assam) atangin Vairengte Police Check Gate hnuaiah a chhuak chho dawn a, heihi Package 3 Vairengte Police Check Gate atanga Chhimluang in a zawm chho leh dawn a ni.

Fourlane package 2 ah hian tualchhung mi 36 ten zangnadawmna an la tawh a, hmalakna chak taka kalpui niin kawngpui sial hi zawh thuai tura ruahman a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

VBGRAMG

Union Rural Development Minister Shivraj Singh Chouhan chuan VBGRAMG chu scheme hmasa MGNREGA scheme-a awng awm laite hnawh phui tura siam a nih thu a sawi. Nimina Bengaluru-a chanchinbumite a kawmnaah he thu hi sawiin Pu Chouhan-a chuan scheme tharah hian ni 100 atangin 125 inhlawhna hun tihpun a ni tawh dawn a ti a. Hei bakah hian technology hmang tangkaiin eirukna awm theite ven a ni ang a ti a. Gram Panchayats te chu programme tihhlawhtlingtu an ni tawh dawn a ti bawk a ni..

<><><>

MAOIST

Jharkhand-a West Singbhum district ah Maoist hel mi 15 sipaiten an kaphlum. Thudawn danin sipaite hian anti-Naxal beihpui thlain Saranda ngaw chhungah Naxal

dapchhuah hna an thawk a. Hel kahhlum zingah hian an hotu zing ami cheng vaibelchhe 1 luman nei mek Central COmmittee Member Anil pawh a tel a. Maoist hel zingah hian mi 11 chu an nihna tihchian a ni tawh bawk a ni.

<><><>

PRAGATI

Prime Minister flagship programme Pro-Active Geovernance and Timely Implemetation,PRAGATI chuan mellung pawimawh tak phunin a tum 50 na inhmuhkhawm hlawhtling takin a nei. He programme hi PM Modian kum 2015 a bul a tan atangin sawrkar inrelbawlna leh hnathawh dana inthlak danglamna tam tak a thleng a. Sawrkar hnathawkte hna thawh dan chu a hunlai ngeia vil a ni a, Prime Minister hoa thlirletna hun hman thin niin hetah hian hmasawнна ruhrel pawimawh tak tak te pawm niin mipuiten lungawilohna an thlente pawh enfiah nghal a ni a thin a. Kum 10 chhungin PRAGATI hian sawrkar thutlukna pawimawh tak takah nasa takin a pui a, hmasawнна hna thawh tikhawtlai thinte chin fel niin sawrkar hnathawkte rintlak lehzuala siam an ni. PRAGATI hnuaia hlawhtling project zingah hain Ahmedabad Rail Project Phase I hi Gujarat-a khawpui inkalpawhna ti changtlung tura hmalakna lian tak pawh hi telh a ni a. Union Housing and Urban Affairs Ministry hnuaiah he project hi thawh niin km 40.03 a thui tur a ni a. Cheng vaibelchhe 12,945 senga tih puitlin tura tih a ni a. Kum 2018 April ni 25 khan a vawi khat nan PRAGATI hnuaiah hnathawh dan thlirho a nia . Hetianga PRAGATI hnuaia vil chhoh anih atang hian chak takin hna tawh a ni a. Kum 2022 September ni 30 khan Prime Minister Narendra Modia chuan mipuite hman theih turin a hawng a.Kum 2022 October thlaah a taka hman tan a ni ta a ni.

<><><>